



Magako idazkia biloa bera tramitarako  
**IDAZKARITZA/ALKATETZA**  
Fase el presente escrito al Negociado de  
..... para su trámite  
2017 FEB. 08  
LASARTE-ORIA  
**IDAZKARI BOKORRAK**

## **ETXEGABETZEAK EKIDITZEKO GIZARTE LAGUNTZEN AURREAN, FINANTZA ERAKUNDEEK DUTEN JARRERA SALATZEKO MOZIOA**

Azkenaldian etxe kaleratzen alorrean herritarren babeserako neurriak hartu diren arren, hauek gehienetan, kaltetuek epaitegietan egindako bidearen ondorio izan dira, eta ez instituzioek kontsumitzaileak babesteko edo finantza erakundeek bezeroen eskubideak errespetatzeko nahikoa borondate izan dutelako.

Ondorioz, ordaindu ezinda etxea galtzeko arriskuan dauden pertsona asko daude oraindik, baita etxea ez galtzeko gizarte laguntzetara jo behar dutenak ere. Epaitegietan kaleratzen aurka ari diren elkarteek eta kaltetuen babesean lanean ari diren abokatuek egindako urratsek, derrigortu egin dute Madrilgo Gobernuak legean egokitzapenak egitera, eta oraindik bide luzea badago ere, urrats positiboak izan diren neurrian, garrantzitsua da hauek betetzen direla ziurtatu eta herritarren eskubideen zaintza areagotzea.

Espainiako Gobernuak emandako urratsetako bat 6/2012 Erret Dekretua izan zen: Bitartekorik ez duten mailegudunak babesteko premiazko neurriak ezartzen dituen.

Guindos dekretu modura ezagutzen den honek, praktika onen kode bat ezartzen du, bere borondatez izena eman eta atxikitzen diren finantza erakundeei. Eta berau baliatuz, baldintza jakin batzuk betetzen dituzten bezeroek, mailegua ordaintzeko zailtasunak badituzte, zor duten dirua ordaintzeko 5 urteko etenaldi bat izateko aukera dute. Epe horretan soilik interesa ordaindu beharko dute, Euribor+0,25. Neurri honen helburua, denbora bitarte horretan mailegua ordaintzeko arazoak dituenaren egoera hobetu eta ordainketari aurre egiteko erraztasuna ematea da, bitartean etxea galdu gabe. Aipatzen dugun Arau honek, Praktika Bankario Egokien Kodeak alegia, atxikitako entitateak, familiaren batek mailegua ordaintzeko arazorik duela jakin bezain laister, Kode honen aplikaziorako beharrezkoa den informazioa eskuragarri jatzera behartzen ditu.

Aipatutako kode horretara, Euskal Herrian maileguak ematen dituzten finantza erakunde nagusiak batu ziren arren, kaleratzen aurka lanean diharduten elkarteek arabera, finantza erakunde hauek egoera horretan dagoen jendeari ez dio aukera hau eskaintzen. Beraien egoera arintzeko lagungarri izan daitekeen formulazioa eskaini ordez, gain zorpetuko dituen beste mailegu bat eskaintzen diote edota abalista modura aritutakoari zorraren ordainketa eskatu.

Hainbat kasutan, egoerari aurre egin ezinda etxea galtzeko arriskuan egon daiteke jendea, aipatu kodea aplikatuz gero, ekidin ahal izango lukeena; era berean, jende askok gizarte laguntzetara jotzen dute, bizi duten une zailari aurre egiteko babes bila. Egoera honen aurrean finantza erakundeek hartutako konpromisoari eutsiko baliote, gizarte laguntza horiek beste behar batzuk asetzeko erabili ahal

izango lirateke.

Egoera hau zuzendu, finantza erakundeek hartutako konpromisoak bete eta gizarte laguntza hauek beste behar batzuetarako erabilgarri izan daitezzen, eh Bildu Udal Taldeak honako mozioa hau aurkezten du Osoko Udal Batzarrean eztabaidatu eta onartu dadin:

1.- Lasarte-Oriako udalak, finantza erakundeen aldetik, mailegua eskatu eta ordaindu ezinean dauden bezeroekiko dagoen jokabidea irmoki salatzen du.

2.- Lasarte-Oriako udalak, herrian bulegoa duten finantza erakundeekin harremanetan jarri eta beraien jarduna nolakoa den ezagutzeko konpromisoa hartzen du; era berean, Praktika Onen Kodean izena eman zuten jakin eta hartutako konpromisoak bete ditzaten eskatzeko ardura ere bere gain hartzen du Udalak.

3.- Lasarte-Oriako udalak, Praktika Onen Kodeak derrigortzen dituen moduan, bere bezeroen artean aukera honen berri zabaltzeko neurriak har ditzatela esijitzen die herrian bulegoa duten finantza erakundeei.

4.- Lasarte-Oriako udalak, Praktika Onen Kodeari zabalkundea emateko informazio kanpaina bat garatzeko konpromisoa hartzen du. Bide batez, Gizarte Zerbitzuetara laguntza eske hurbiltzen diren herritarrei gaiaren inguruan informazio zehatza emateko baliabideak jarriko ditu udalak.

Lasarte-Orian, 2017ko otsailak 8

EH Bildu Udal Taldearen izenean

